

Siunnersuummut nassuiaatit

Naliginnaasumik nassuiaatit

1. Allaqqaasiut

2022-imut aningaasanut inatsimmik akuersissuteqarnermut atatillugu, utoqqarnut atugassarititaasunut pitsanngorsaatisat, 2022-imut atugassatut 15 millioner kr.-inik, aammalu 2023-imiit siumullu, ukiumut 30 mio. kr.-inik immikkoortitsisoqarpoq. Aningaasaliissutinik tunniussat, utoqqalinersialinnut siusinaarlutillu pensionisialinnut atugassarititaasunik pitsanngorsaatisat atorneqartussaapput.

Tamatuma kingunerisaanik, utoqqalinersiat- aamma siusinaartumik pensionisiat pillugit inatsisini allanngortitsiviusumik UPA 2022-mi immikkoortoq 25-imi siunnersuutitut saqqummiussisoqarpoq.

Utoqqalinersiaqarneq pillugu Inatsisartut inatsisaanni utoqqalinersiat tunngaviusumik annertussusiliussat qaffanneqarput aammalu siusinaartumik pensionisiat pillugit Inatsisartut inatsisaanni ilaatigut siusinaartumik pensionisiat qaffasinnerpaanut annertussusiliussat qaffanneqarlutik.

Inatsisissatut siunnersuummik oqaluuserinninnermi aamma akuersissuteqarnermi, siunissami, akileraarutit sioqqullugit, utoqqalinersiallit ukiumut 9.000 kr.-inik imaluunniit qaammammut 750 kr.-inik pinerusalissasut, tusagassiuutinut nalunaarutigineqarpoq.

Qaffaaneq tamanna, tassalu, ukiumut 9.000 kr.-inik qaffaaneq, inatsisissatut siunnersuummi siunertaasimavoq.

Tamatumunnga peqatigitillugu, qaffasinnerpaamik siusinaartumik pensionisiallit, ukiumut 5.660 kr.-inik, tassa qaammammut 470 kr.-inik qaffaavigineqassasut, eqqaaneqarpoq.

Tassa, annertussusiliussanut tulluarsaasarneq tunuliaqutaralugu ukiumoortumik iluarsisarnerup naliginnaasup saniatigut, katillugit ukiumoortumik 30 mio. kr.-inik qaffaasoqassasoq aningaasanut inatsimmi siunertaasimavoq.

Allanguutissatut inatsimmik suliaqarneq 2021-imi aallartinneqarsimavoq. Suliaqarnermi naliginnaasumik ukiumoortumik annertussuserititanik nalimmassaasarneq, aammalu inatsisissatut siunnersuut 2022-imi sunniuteqalissasoq eqqarsaatigineqarsimangillat. Periaaseq eqqortoq, 2021-imiit utoqqalinersialinnut annertussuserititamut, 2022-imut annertussuserititamik tulluarsaatitut procentimik nalimmassaaseeqqaarnermik, tamatumalu kingorna 9.000 kr.-inik qaavatigut ilassuteqarnermik nassataqartussaasimagaluarpoq. Tamatuma assinganik siusinaartumik pensionisialinnut pisoqartussaasimagaluarpoq. Tassa imaalluni qaffasinnerpaamik siusinaartumik pensionisialinnut annertussuserititaq, 2022-imut annertussuserititamik tulluarsaatitut procentimik nalimmassaaseeqqaarlugu, tamatumalu kingorna, 5.660 kr.-inik qaavatigut ilassusigassaagaluarluni.

Taanna, taamanikkut piviusunik tunngaveqarluni, naatsorsueriaaseq, utoqqalinersiallit, siunertarineqartumut naleqqiullugu qaammammut 118 kr.-inik ikinnerusunik pisarsimanerannik, ilaatigut kinguneqarsimavoq.

Tamatumunnga atatillugu, 1. juli 2022-mut kingumoortumik atuuttumik, taakku amigaataasut sinneruttut 118 kr.-nit akilerneqartarnissaat pillugu, naalakkersuisoqarfimmit kommuninut nalunaarutigineqarpoq. Tamatumunnga malitsigitillugu, qulaani nalunaarummut inatsisinik tunngavigisamut apeqqut pillugu oqaaseqaatalinnik, kommuniniit arlalinnik saaffiginnissuteqartoqarsimavoq.

Tamanna tunuliaqutaralugu, 1. juli 2022-miit kingumut sunnuteqartillugit, utoqqalinersiatut aamma siusinaartumik pensionisiatut pisartagassatut annertussusiliussat, toqqaannartumik inatsimmi erseqqissumik aamma eqqortumik ersitsillugit, manna siunnersuut suliarineqarpoq.

2. Siunnersuummi immikkoortut pingaernerit

2022-imut aningaasanut inatsimmik akuersissuteqarnermut atatillugu, aningaasaliissutitut akuersissutigineqartut, aningaasat ilassutit tamaasa kommunit akilerneqarnissaannut, erseqqissumik paatsuugassaannngitsumillu inatsisitigut tunngavissaqassasoq, siunnersuummik qulakkeerneqassaaq. Tamanna tunuliaqutaralugu, siunnersuummik matuminnga, utoqqalinersianut siusinaartumillu pensionisiantut inatsisini ataani allassimasunik allannguutinik suliaqartoqarpoq.

Utoqqalinersiat

Utoqqalinersiat juni 2022 ilanngullugu ukiumut 65.652 kr.-inik annertussuseqarsimapput. Siunnersuummi siunertaasutut, juli 2022 aallarnerfigalugu atuutilersillugu, ukiumut 9.000 kr.-inik qaffaaneq, ukiumut 74.652 kr.-inik annertussuseqalersitsissaaq. Tassa imaappoq utoqqalinersiat juli 2022-miit december 2022 ilanngullugu qaammammut 750 kr.-inik qaffassapput.

2023-mut aningaasartat 74.652 kr.-it annertussusiliussanut procentimik aaqqiissutaasartumik iluarsineqassapput. 1. januar 2023-mi atuutilersumik iluarsinerup kingorna 76.369 kr.-inngussapput.

Siusinaartumik pensionisiat

Siusinaartumik pensionisiat qaffasinnerpaat juni 2022 ilanngullugu ukiumut 121.291 kr.-iupput.

Siunnersuummi siunertaasutut Juli 2022-imiit atuutilersillugu 5.660 kr.-inik qaffaaneq, ukiumut 126.951 kr.-inik annertussuseqalersitsissaaq. Tassa imaappoq siusinaartumik pensionisiat qaffasinnerpaat juli 2022-miit december 2022 ilanngullugu qaammammut 470 kr.-inik qaffassasut.

2023-mut aningaasartat 126.951 kr.-it annertussusiliussanut procentimik aaqqiissutaasartumik iluarsineqassapput. 1. januar 2023-mi atuutilersumik iluarsinerup kingorna 129.870 kr.-inngussapput.

Atuutilersitsineq

Inatsisiliornermi siunertaasoq taamaalilluni tamakkiisumik piviusunnorsinnaaqullugu, allannguutissatut inatsit kingumoortumik ulloq 1. juli 2022-miit sunniutilimmik atuutilersinneqassasoq siunnersuutigineqarpoq.

Taamatutaaq 2022-mut aningaasanut inatsimmik

akuersissuteqartoqarneranut atatillugu utoqqaat atugaannik pitsanngorsaansamut aningaasat immikkoortinneqartut kalluarneqartunut tamakkiisumik iluaqutaanissaat qulakkeerneqassaaq.

3. Aningaasaqarnikkut allaffissornikkullu pisortaqaqfinnut kingunerisassai

Aningaasartuutaasussanngitsutut isigineqarmat, siunnersuut pisortanut aningaasaqarnikkut allaffissornikkullu kinguneqassanngilaq.

Qulaani eqqaaneqartutut 2022-imut aningaasanut inatsimmik akuersissuteqarnermut atatillugu 15 mio. kr.-inik, utoqqarnut atugassarititaasunut pitsanngorsaatissatut, 2022-imut atorneqartussanik, aammalu 2023-imiit siumut ukiumut 30 mio. kr.-inik immikkoortitsisoqarsimavoq.

Siunnersuummik, aningaasaliissutitut akuersissutaareersut aningaasat atorneqarnissaannut, taamaallaat erseqqissumik aamma paatsuugassaannngitsumik inatsisitigut tunngavissaq qulakkeerniarneqarpoq. Taamaalilluni matumani, siunnersuummik naammassinninniarnermut ilassutitut aningaasanik ujarlertoqarnissaa pineqanngilaq, tassami annertussusilikkanut qaffaanernut 1. juli 2022-imiit siumut, kommunit taarsiuteqarfigineqareermata.

4. Inuussutissarsiornermut aningaasaqarnikkut aamma allaffissornikkut kingunissai

Siunnersuut inuussutissarsiornermut aningaasaqarnikkut imaluunniit allaffissornikkut kinguneqassanngilaq.

5. Avatangiisinut, pinngortitamut aamma inuit peqqissusaannut kingunissai

Siunnersuut avatangiisinut, pinngortitamut aamma inuit peqqissusaannut kinguneqassanngilaq.

6. Innuttaasunut kingunerisassai

Naalackersuisoqarfiup kommuninut saaffiginninneratigut utoqqalinersiat ulloq 1. juli 2022-mi iluarsineqareermata inatsisissatut siunnersuut utoqqalinersialinnut aningaasaqarnikkut kinguneqassanngilaq. Taamaattumik utoqqalinersianut atatillugu qaffaanissamut siunertarinqartumut inatsisitigut tunngavissaq pisariaqartoq inatsisissatut siunnersuummik qulakkeerneqarpoq.

Siusinaartumik pensionisialinnut, qaffasinnerpaanik pisinnaatitaasunut, siunnersuut akuersissutigineqarpat ilaatigut siusinaartumik pensionisiat qaammammut 461 kr.-inik qaffanneqarnerannik ilaatigullu ulloq 1. juli 2022 aallarnerfigalugu annertussusilikkanik malinnaasitamik iluarsiviginninnermik kinguneqassaaq.

Taamaalilluni inatsisiliornermi siunertaq tamakkiisumik piviusunnorgortinneqassaaq.

7. Kingunerit allat pingaarutilit

Siunnersuutip allanik pingaarutilinnik kinguneqarnissaa naatsorsuutigineqanngilaq.

8. Tusarniaaneq

Siunnersuut piffissami 02. marts 2023-imiit, 10. marts 2023-ip tungaanut, www.naalakkersuisut.gl -imi tusarniaanermut nittartakkami tamanut saqqummiunneqarnikuuvoq, piffissamilu tamatumanerpiaq, Avannaata Kommuniani, Kommune Kujallermi, Kommune Qeqertalimmi, Kommuneqarfik Sermersuumi, Qeqqata Kommuniani aamma Utoqqaat Illersuisuanni tusarniaassutigineqarluni. Siunnersuummik, Inatsisartut inatsisaannik nr. 9, 20. juni 2022-meersumik akuersissutiginninnermi siunertaasimasoq, inatsisitigut inissisimaffik allanngortinneqanngimmat, kisiannili taamaallaat naatsorsueriaatsimik tunngaviusumi kukkunernik iluarsiinissaq, taamaalillunilu, Inatsisartut inatsisaannik siunertaasoq naapertorlugu akiliuteqartarnissanut, paatsuugassaannngitsumik inatsisitigut tunngavissamik pissarsinissaq siunertaasimalluni, tusarniaanissamut piffissarititaasoq periaaserineqartartumiit sivikinnerusimavoq.

Tusarniaaneq aamma akissutinut tiguneqarsimasut pillugit ilanngussaq 2-mut innersuussisoqarpoq.

Siunnersuummi aalajangersakkanut ataasiakkaanut oqaaseqaatit*§ 1-imut*

Nr. 1-imut

Utoqqalinersiat toqqammaviusumik annertussusaat piffissami 1. juli 2022-miit, 31. december 2022 ilanngullugu ukiumut 74.652 kr-iussasut aamma 1. januar 2023-miit siumullu, 76.369 kr-iussasut aalajangersakkamik aalajangersarneqarpoq.

Kaajall. nr. 294, 1. januar 2022-meersumi § 5, imm. 1-i naapertorlugu utoqqalinersiat juni 2022 ilanngullugu ukiumut 65.652 kr-iupput. Inatsisartut inatsisaannik nr. 9, 20. juni 2022-meersumik akuersissuteqarneq malillugu siunertarineqartoq qaffaatissaq tassunga 9.000 kr-it ilanngunneqassapput.

Tassa imaappoq utoqqalinersiat ulloq 1. juli 2022 aallarnerfigalugu ukiumut 74.652 kr-it angullugit imaluunniit qaammammut 6.221 kr-it angullugit annertussuseqassapput. Aningaasat annertussusaat 2023-mut iluarsineqassapput. Procenti annertussutsimut aaqqiissutaasartoq, Kalaallit Nunaanni Naatsorsueqqissaartarfiup saqqummiussaa 102,3%-iusoq, atorlugu tamanna pissaaq. Annertussutsimut aaqqiissutaasartoq tunngavigalugu iluarsineq 1. januar 2023 aallarnerfigalugu utoqqalinersiat ukiumut 76.369 kr-inngornerannik imaluunniit qaammammut 6.364 kr-inngornerannik kinguneqassaaq.

§ 2-mut

Nr. 1-imut

Siusinaartumik pensionisiat qaffasinnerpaat aningaasartaasa annertussusaat piffissami 1. juli 2022-miit, 31. december 2022 ilanngullugu, ukiumut 126.951 kr-iussasut aamma 1. januar 2023-miit siumullu 129.870 kr-iussasut aalajangersakkamik aalajangersarneqarpoq.

Siusinaartumik pensionisiat qaffasinnerpaat, qinnuteqartunut 0-imiit 25 % tikillugu sulisinnaassuseqartunut akuersissutigineqartarput. Kaajall. nr. 294, 1. januar 2022-meersumi § 6, imm. 1-i naapertorlugu, siusinaartumik pensionisiat qaffasinnerpaat juni 2022 ilanngullugu ukiumut 121.291 kr-it angullugit annertussuseqassapput. Inatsisartut inatsisaannik nr. 9, 20. juni 2022-meersumik akuersissuteqarneq malillugu siunertarineqartoq qaffaatissaq tassunga 5.660 kr-it ilanngunneqassapput. Tassa imaappoq utoqqalinersiat ulloq 1. juli 2022 aallarnerfigalugu ukiumut 126.951 kr-it angullugit imaluunniit qaammammut 10.579 kr-it angullugit annertussuseqassapput. Aningaasat annertussusaat 2023-mut iluarsineqassapput. Procenti annertussutsimut aaqqiissutaasartoq, Kalaallit Nunaanni Naatsorsueqqissaartarfiup saqqummiussaa 102,3%-iusoq, atorlugu tamanna pissaaq. Annertussutsimut aaqqiissutaasartoq tunngavigalugu iluarsineq 1. januar 2023 aallarnerfigalugu siusinaartumik pensionisiat qaffasinnerpaat ukiumut 129.870 kr-inngornerannik imaluunniit qaammammut 10.823 kr-inngornerannik kinguneqassaaq.

§ 3-mut

Atuutsitsinermut piffissaq soorluttaaq sunniuteqartitsinermut piffissaq aalajangersakkamik aalajangersarneqarpoq. Sunniuteqartitsinermut piffissaq, inatsimmik pisortatigoortumik atuutilersitsiffimmik piffissamik, atuutsitsinermut piffissamik, sioqqutsimmat, inatsit ulloq 1. juli 2022 aallarnerfigalugu kingumoortumik atuutissaaq.

Ilanngussaq 1-i

Inatsimmut atuuttumut naleqqiullugu inatsisissatut siunnersuut	
<i>Oqaaseqatigiiliorneq atuuttoq</i>	<i>Inatsisissatut siunnersuut</i>
	<p style="text-align: center;">§ 1-i</p> <p>Inatsisartut inatsisaatigut nr. 9, 20. juni 2022-imeersukkut allanngortinneqartoq Namminersorlutik Oqartussat inatsisinik nalunaarutaat nr. 3, 7. februar 2022-imeersoq naapertorlugu, utoqqalinersiaqarneq pillugu Inatsisartut inatsisaanni tulliuttunik allannguisoqarpoq:</p>
<p>§ 9. Utoqqalinersiat toqqammaviusut ukiumut 73.239 kr-it angullugit annertussuseqarput.”</p>	<p>1. § 9, imm. 1 imatut oqaasertalerneqarpoq:</p> <p>”Utoqqalinersiat toqqammaviusut piffissami 1. juli 2022-miit 31. december 2022 ilanngullugu ukiumut 74.652 kr-it angullugit annertussuseqarput. Tamatuma kingorna utoqqalinersiat toqqammaviusut 1. januar 2023 aallarnerfigalugu ukiumut 76.369 kr-it angullugit annertussuseqarput.”</p>
	<p style="text-align: center;">§ 2</p> <p>Inatsisartut inatsisaatigut nr. 9, 20. juni 2022-meersukkut aamma Inatsisartut inatsisaatigut nr. 18, 21. november 2022-imeersukkut allanngortinneqartoq Namminersorlutik Oqartussat inatsisinik nalunaarutaat nr. 2, 4. februar 2022-imeersoq naapertorlugu Siusinaartumik pensionisiat pillugit Inatsisartut inatsisaanni, tulliuttunik allannguisoqarpoq:</p>
<p><i>Imm. 2.</i> Siusinaartumik penisionisiat qaffasinnerpaat ukiumut 124.340 kr-it angullugit annertussuseqarput.”</p>	<p>1. § 17, imm. 2 imatut oqaasertalerneqarpoq:</p> <p>”<i>Imm. 2.</i> Siusinaartumik pensionisiat qaffasinnerpaat piffissami 1. juli 2022-miit 31. december 2022 ilanngullugu ukiumut 126.951 kr-it angullugit annertussuseqarput.</p>

	Tamatuma kingorna siusinaartumik pensionisiat qaffasinnerpaat ulloq 1. januar 2023 aallarnerfigalugu ukiumut 129.870 kr-it angullugit annertussuseqarput.”
	§ 3 Inatsisartut inatsisaannik tamanut saqqummiussinerup aqaguani Inatsisartut inatsisaat manna atuutilissaaq, aammalu utoqqalinersiaqarnermut siusinaartumillu pensionisiaqarnermut 1. juli 2022-miit sunniuteqalersumik atuutilissalluni.

Ilanngussaq 2**Tusarniaanermut akissutit**

Tusarniaanermut akissutinik tulliuttuniit tigusaqartoqarpoq:

- Avannaata Kommunia
- Kommune Kujalleq
- Kommuneqarfik Sermersooq
- Utoqqaat Illersuisuat

Tulliuttut oqaaseqaateqanngillat:

- Utoqqaat Illersuisuat

Ataani tusarniaanermut akissutit, Isumaginninnermut, Suliffeqarnermut Nunamullu Namminermut Naalakkersuisoqarfimmut tunniunneqartut, imarisaat pingaarnersiukkat tullerriaarneqarput. Tusarniaanermut akissutinut naalakkersuisoqarfimmit oqaaseqaatit uingasumik allataallutik, tusarniaanermut akissutit assilineri ilaatigut aaqqissuussat matumani pineqarput.

Avannaata Kommunia

Naak Avannaata Kommuniata piffissaliussamik ullunik pingasunik qaangiisimagaluartoq tusarniaanermut akissutit ilanngunniarlugit naalakkersuisoqarfimmit toqqarneqarsimavoq.

Avannaata Kommuniانيت allaatigineqarpoq, »2022-mut Aningaasanut inatsimmi allassimasut aningaasat annertussusaannik inatsisinut akerliujunnaarsitsiniaanermik periaatsit, Inatsisissatut siunnersuut isikkoqartoq. Tamanna, inatsisip kingumoortumik atuuffeqarnissaanut atatillugu, inatsisinik suliaqarnermut tunngatillugu, ingerlatsinermut ileqqunut pitsaasunut akerliulluinnartuuvoq. Inatsit, ulloq sunniuteqarfigisassani sioqqullugu akuersissutigineqarsimasussaagaluarpoq.«

Tamanna tusaatissatut tiguneqanngilaq.

Tamanna, ingerlatsinermut ileqqut pitsaasut, ingerlatsinermut inatsisini najoqqutassiat aamma eqqartuussinerni tunngaviusumik oqaaseqatigiit imaluunniit inatsisitigut akuersisaasut najoqqutassiat malillugit, kingumoortumik atuutilersitsiffiusumik inatsisip akuersissutigineqartarnera, pingaartumik inatsit sutigut tamatigut innuttaasunut pitsaasumik sunniuteqassatillugu, innuttaasullu attugaasut pitsaanerusumik inissinneqassatillugit sumilluunniit akorngutissaqanngilaq.

Aammattaaq, »tusarniaanermut piffissarititaq naleqqutinngitsumik sivikippallaartoq Avannaata Kommuniانيت allaaserineqarpoq. Inatsisissatut siunnersuut tamanna suliarineqassasoq, piuminartuusrul, sivisuumik ilisimaneqarpoq. Taamaattumik,

inatsisissatut siunnersuummut nassuiaatini nalinginnaasuni, nassuiaatit apeqputaatinagu, inatsisissatut siunnersuut taama kingusitsigisukkut tusarniaassutigineqarmat, naleqquttumik pissutissaqanngilaq.«

Naalackersuisoqarfimmit, piffissarititaq sivikitsoq tamanna pillugu nassuiaatinut nalinginnaasunut innersuussisoqarpoq. Naalackersuisoqarfimmit eqqaaneqarpoq, naak piffissarititaq qaangerneqarsimagaluartoq, Avannaata Kommunanit tusarniaanermut akissutit ilanngunneqarsimasut.

Tamatuma saniatigut Avannaata Kommunanit allaatigineqarpoq, innuttaasut pension-inik pisartagallit, aningaasanut inatsimmi, pension-ip annertussusaa pillugu paasisassarsiornissamut innersuunneqassanngitsut.

Naalackersuisoqarfimmit eqqaaneqarpoq, inatsit, akuersissuteqartoqarnerata kingorna, malittarisassat atuuttut malillugit tamanut saqqummiunneqarumaartoq. Aammattaaq eqqaaneqassaaq, pisortani oqartussaasut, ilaatillugu kommuni, oqartussaasut innuttaasumut ilisimatitsissasut, oqaatigineqarluni, qanoq innuttaasooq inatsimmik attuumassutilimmik, soorlu matumani pineqartumi aningaasanut inatsisaanngitsumik, nassaarsinnaasooq, inatsisini aalajangersagaasumik ilitersuisussaataammata.

Kommuni Kujalleq

Allannguutitut inatsimmik siunertaasooq immini ajunngitsuusoq, Kommune Kujallermit eqqaaneqarpoq, taamaattoq, ilumut pension-imik qaffaaneq tamanna, pilersuisinnaanermut tunngaviummik pitsannguineramik isumaqassanersoq, kommunimit takujuminaatsinneqarluni. Utoqqalinersialinnut- aamma siusinaartumik pensionisialinnut inuuniarnermi atugassarititaasunik pissutsinik atuuttunik pitsanngorsaanissaq, politikikkut anguniagaappat, allannguummik siunnersuutigineqartumik ilumut anguneqarsinnaanera qularineqarpoq. Taamaattumik allannguummut siunnersuutigineqartumut peqatigitillugu, boligsikring-imut aningaasat killissarititaasut minnerpaaffii- aamma annerpaaffii nalilivigissallugit eqqarsaatigineqartariaqarpoq.

Siunnersuummut matumunnga missingiummi aalajangersakkanut oqaaseqaatit attuumassuteqanngimmata, ilanngunneqanngillat.

Kommunimit oqaaseqaatit Naalackersuisoqarfimmit ima paasineqarput, ilaatigut utoqqalinersialinnut- aamma siusinaartumik pensionisialinnut inuuniarnermut atugassarititaasunik atuuttunik ilumut siunnersuut pitsanngorsaaqataassanersoq, qularineqartoq, ilaatigullu boligsikring-imut aningaasat killissarititaasut minnerpaaffiinik- aamma annerpaaffiinik eqqarsaatiginninnissaq inassutigineqartoq.

Siullertut, sutigut tamatigut aningaasaqarnikkut atuisinnaanermut taamalu inuuniarnermut atugassarititaasunik atuuttunik pitsaanerusumik tunniussiumaartumik, siunnersuummik pension-imut qaffasinnerusumut inatsisitigut tunngavissamik pilersitsisoqarpoq. Aappaattut, aningaasat annertussusaannut killissarititaasut minnerpaaffinik- aamma annerpaaffinik naliliinissaq pillugu apeqqut boligsikring-i pillugu suliamut tamarmut, siunnersuummik matuminnga suliaqarnermut tunngaviusimangitsumut, tunngajumaarluni, taamalu utoqqalinersialinnuunnaq- aamma siusinaartumik pensionisialinnuunnaq samminani.

Kommuneqarfik Sermersooq

Kommuneqarfik Sermersuumit allaatigineqarpoq, innuttaasut ilimasaarneqarnermittut annertussusiliussat qaffaataannik pinerat ajunngitsuusoq, kommunimiillu, annertussusiliussanut allannguutitut eqqarsaatigineqartut ingerlanneqarnissaannut inatsisitigut tunngavissamik erseqqissumik aamma eqqortumik maanna kommunit peqalernerat taparserneqarluni. Kommunit tamanna sioqqullugu ingerlatami siunnersuummilu matumani, arlaleriarlutik innuttaasut pisassaannik nutaamik naatsorsuisartussaammata, siunnersuut pisortanut allaffissornikkut kinguneqassannginnera pillugu inerniliineq isumaqatigineqanngitsoq Kommuneqarfimmit aammattaaq allaatigineqarpoq. Taamaalilluni Suliffeqarnermut Isumaginninnermullu Ingerlatsivimmit, siunissami naalakkersuisoqarfimmit, allannguutissatut siunersuutitut assingusunut, aalaakkaanusumik ingerlatsisarnissaq anguniarneqassasq siunertamut naapertuuttutut isigineqarpoq.

Tusaatissatut tiguneqarpoq.

Aalajangersakkanut ataasiakkaanut oqaaseqaatit

Immikkoortup matuma ataani kommuni ima allataqarpoq:

”§ 2 pillugu siunnersuummut naalakkersuisoqarfimmit oqaaseqaatini qupperneq 4-mi, allassimavoq: "Qaffasinnerpaamik siusinaartumik pensionisiat juni 2022-ip tungaanut ilanngullugulu ukiumut 121.219 kr.-inik annertussuseqarput." (ataatigut titarniliineq ilanngunneqarpoq).

Oqaatigineqassaaq, kisitsit eqqortunngortillugu ukiumut 121.291 kr-inngortillugu allanngortinneqassammat.”

Naqinnerliuineq iluarsineqarpoq.